

Da duas varts en la zanga – la lescha per gieus da daners

Il cumbat per la votaziun dals 10 da zercladur ha cumenzà

DA CLAUDIA CADRUVI / ANR

■ Las partidas giuvnas cumbattan la lescha per gieus da daners, ma er organisaziuns che vulan proteger da la dependenza da gieus. Ier ha Simonetta Sommaruga lantschà il cumbat da votaziun. Sustegn survegn la ministra da giustia dals chantuns ed or dal ravugl dal sport. Avant intgins onns ha il tribunal penal a Blinzuna stuì laschar mitschar dus giugadurs da ballape ch'avevan manipulà gieus. Els avevan admiss ch'els hajan aposta procurà ch'il FC Thun perdia. In rudè da scumessas da sport aveva unschì els. Ma il tribunal n'ha betg pudì chastiar els – i ha mancà la basa legala.

Trais fin tschintg onns praschun

«Talas manipulaziuns criminalas attagian il fundament dal sport», ha ditg ier *Matthias Remund*, il directur da l'uffizi da sport. Sch'i saja cler da bell'entschatta tgi che gudogna n'haja quai da far nagut pli cun sport. La nova lescha preveda chastis d'enfin trais onns praschun per tgi che manipulescha concurrenz sportivas. Per gruppas criminalas èn prevedids chastis fin tschintg onns.

Medemamain betg reglads en Svizra èn ils gieus per daners en l'internet. La nova lescha lubescha tals gieus sch'els derivan da purschiders cun ina concessiun. Gieus illegals or da l'exteriur duain vegnir bloccads. Già 17 auters pajais europeics enconuschan talas bloccadas en l'internet.

Proteger dal bancrut

Blers Svizzers hajan tschaffen da giugar lotto, roulette e poker e per part possian ins schizunt gudagnar blers daners, ha ditg Simonetta Sommaruga. Ma ils gieus possian era chaschunar dependenzas. La



Ier ha Simonetta Sommaruga lantschà il cumbat da votaziun.

KEYSTONE

finamira da la lescha saja dad impedir che tscherta glieud mettia en privel l'atgna existenza e ruineschia l'entira famiglia. Quai capitia entras scumonds da giugar per personas periclitadas. Ils casinos ed ils purschiders en l'internet hajan l'obligaziun dad observar ed exequir quests scumonds.

La dependenza saja spezialmain privlusa en l'internet, ha ditg Sommaruga. La notg a chasa dovria quai mo paucs clics ed ins saja gia sin in portal da giu.

Plinavant veglia la lescha proteger ils giugadurs e las giugaduras da cugliunarias ed evitar ch'i vegn lavà daners en casinos.

Ina milliarda per il cuminesser

Per ils chantuns saja la lescha da muntada speziala, ha ditg cusseglier guvernativ *Hans-Jürg Käser*. Ils chantuns restian vivanant cumpetents areguard la lottaria e la scumessa da sport. Da nov dastgian els lubir pitschens turniers da poker.

Bunamain ina milliarda francs flessegia mintg'onn or da casinos, lottarias e

scumessas tar l'AVS e tar ils chantuns che spendan ils daners per cultura, sport ed intents socials. Betg mo ils profi-sportists profiteschian, mabain era nundumbraivels pitschens clubs, ha ditg Käser. Ils purschiders da gieus illegals en l'internet na contribueschian nagins gudogns e la Svizra perdia uschia blers milliuns. Gist tals purschiders cun sez a Malta u Gibraltar hajan finanzia partidas giuvnas per ch'ellas prendian il referendum.

Cumbattì da duas varts

Las partidas giuvnas argumenteschan cun la libertad economica e la libertad d'infurmaziun. Ellas crititgeschan che las bloccadas da paginas illegals sajan memia restrictivas. «Sa chapescha che l'internet è ina spazi da libertad», ha ditg Sommaruga. «Ma i n'è nagin spazi ch'è liber da tut dreg.»

Fruent encunter la lescha fan er organisaziuns che gidan da sa liberar or da la dependenza da giugar. Per questas organisaziuns è la lescha memia miaivla. Ellas giavischassan scumonds pli severs.